



# Tir Yimym

www.tiryimim.in

Regd. No. RNI. NAGAAO/2004/13113. Postal-NE/RN-717.

e-mail : tiryimim@gmail.com

TAPAK 3

Yangia anidakangma :

Tir Yimym

tiryimim@aolima

tir yimym

TAPAK 7

'India-i tangar linük indang ali inch ka danga magi': Rajnath

Ukraine tashi temdaksütsü atema Russia-i tasa asadar: Zelenskyy



VOL. XX NO. 82 (ADOK 82) DIMAPUR

RASEMNÜ (WEDNESDAY)

ANEJETI (JANUARY) 04, 2023

₹ 5.00

## Nagaland DGP T J Longkumer-i mapa nungi sodi agir

**Dimapur, January 3, 2023 (Agencies):** Nagaland Director General of Police T J Longkumer-i January 2, 2023 nü mapa nungi sodi agiogo. Pa nem ita 6 service extension agütsüba atema ashishitep ken o ka adok.

1992 batch Nagaland cadre IPS officer Rupin Sharma-i T J Longkumer melenzüksü akok ta imlar. Rupin ya tanga DG (Prisons & HG, CD & SDRF) inyaker.

DGP John Longkumer nem mezüngbuba service extension agütsüba August 31, 2022 nü tembangba sülen ano pa nem ita 6 service extension agütsüba ajanga ashishitep ken o ka adok.

Supreme Court-ia Nagaland sorkar, Union Ministry of Home Affairs (MHA) aser UPSC dang December 19, 2022 matongdang Nagaland Director General of Police (DGP) shimba maparen tembangsü atema tetuyuba ka agüja liasü.

Union Public Service Commission (UPSC)-i Nagaland DGP shimba maparen renemtsü atema anogo 60 meshilok saka ibaji Chief Justice D Y Chandrachud aser Justice P S Narasimha na adenba bench-i magizük.

July 2018 nung Supreme court-i linük nung police reforms atema tetuyuba aika agüja liasü aser States o UTs dang police ketdangsür shinga 'acting DGPs' ama meshimtsü tenokdangba agütsü.

UPSC-i state sorkar aser sendaktepa alirtem den asüngdangtepa senior police officers asem shimtetsü aser parnok rongnung nisung mashi ka DGP shimtsü ta inyakyim lateta lir.

1991 batch Chhattisgarh cadet IPS officer TJ Longkumer ya June 27, 2018 nü Nagaland DGP inyaksü atema deputation nung anir aru. Pa ya inter-state cadre officer ama Nagaland-i anir aru.

MHA-i 'administrative grounds' nung ajemdaker küm 3 atema 'inter-cadre' deputation asütsü mulunga agizükba sülen pai June 27, 2018 nungi Nagaland DGP inyaksü tenzük.

T. John Longkumer-i DGP Nagaland inyaksü shimba mapang nunga nisung aikati pa küm 30 mapa inyaksü tasazük matong ta ashishitepa liasü.

Pa mapa nungi anisüngzüksü mapang atongba sülen August 31, 2022 tashi ita 6 service extension agütsü. Iba mapang tembangba sülen pa nemsä ita trok (February 2023) tashi Nagaland DGP inyaksü mapang agütsüsem.

Yaküm November ita Rising People's Party (RPP)-i Nagaland DGP T. John Longkumer agentsü atema takhangba agüja liasü.

T.J Longkumer lenisüba kübok Central Bureau of Investigation (CBI) telok kati ozüng alema inyaksangshir tetsüdi Abu Salem tsüngsü puter aser India-i anir arua liasü. Paisa Bosnia nung United Nations Peacekeeping Mission nung shilem agiogo aser tanga mapa aika rongnung Nagaland prison system nung temelenshi aika bener aruogo.

Osang angazükba agi, 1991 batch IPS officer Sunil Acharya-i Nagaland DGP inyaksü memulunger. Pa ya Nagaland nung senior most police officer aser deputation nung lir.

## Modi & Shah nati Nagaland semdangtsü

**Kohima, January 3, 2023 (Agencies):** Eastern Nagaland Peoples' Organization (ENPO)-i state balaka akümtsü akhangba aser Naga yimten tebilemstü atema Prime Minister Narendra Modi aser Home Minister Amit Shah nati Nagaland semdangtsü ta Chief Minister Neiphiu Rio-i Mongulbarnü metetdaksü.

Amit Shah-i January 6 nü Nagaland semdangtsü aser Eastern Nagaland Peoples' Organisation (ENPO) lennirtem den ajuruteptsü. Paisa 61 buba Zhadima village Youth and Sports Organization (ZVYSO) nung adentsü, ta Rio-i ashi.

Nagaland state assembly elections ya February tatemang hopta mesüra March ita

tetenzüklen agitsü akok aser iba jagi PM Modi-i January tom ka tashi nung Nagaland semdangtsü imlar, ta paisa metetdaksü.

Ajisüaka, Election Commission of India (ECI)-i Nagaland state assembly elections agitsüba osang ano memetetdaksü lir.

"Amit Shah-i Nagaland semdangba ajanga Naga yimten latetsüba indang osang jangjatsü. Yimten melatetra ECI-i sangoktsüba ama state assembly elections agitsü. Ajisüaka, ibaji masüdag yimten latetra state Assembly, Lok Sabha aser Rajya Sabha nung menden teimba akümba den yimjung aser rongsenketzüng terenlok arutsü" ta CM Rio-isa ashi.

## Cabinet-i ENPO dang takhangba meyipa reprangshitsü mepir

**Kohima, January 3, 2023 (TYO):** Nagaland Cabinet-i Mongulbarnü Eastern Nagaland People's Organisation (ENPO) dang state balaka akümtsü akhangba meyipa reprangshitsü mepishiogo.

"Mongulbarnü Chief Minister indang residential complex nung State Cabinet senden amendang iba ya lemtet" ta Planning & Coordination, Land Revenue and Parliamentary Affairs Minister, Neiba Kronu-isa ashi.

"Onoki ENPO nung pusema nungiter saka Naga nung ajak taginüba nung ajemdaker parnok dang state balaka akümtsü akhangba meyipa reprangshitsü mepishitsü lemtet" ta pai ashi.

Union Home Minister Amit Shah-i January 6 nü Nagaland semdangtsü aser Prime Minister Narendra Modi-i January 10 sülen ang semdangtsü akok ta Minister Kronu-isa ashi.

Cabinet-i ashiba ama ENPO-i inyakra parnok nem package kar agütsütsü lir asü ta osangbeneri asüngdangdang "tamasa Centre aser ENPO tsüngda jembiba state sorkar dang ashitsüla aser iba

sülen jiang state sorkari telemtetba ka agitsü akok" ta Kronu-i langzü.

"ENPO-i akhangba onük ya kanga tongtipang saka UDA sorkar atemabo Naga yimten latetsüba ang tongtipangba aser iba jagi onoki Centre dang iba mapa tekaraba nung inyakang ta ashitsü lemtetogo" ta United Democratic Alliance (UDA) co-chairman aser MLA Kuzholuzo Nienu-isa ashi.

ENPO ken o ya kanga tongtipang aser Cabinet-i ENPO dang Naga nung ajak ajungtsü mechi parnok akhangba khen meyipa reprangshitsü mepishiogo ta MLA Kuzholuzo-isa ashi.

Cabinet-i kodanga state balaka agütsütsü mashi aser July 23, 2011 nung Cabinet-i Naga nung aliba tesem ajak ka akümtsü atema ola adokogo aser onok tang tashi iba tangatetba nung lir, ta paisa ashi.

Cabinet-i parnok timtem angateta autonomous council ka tentet junger ta shidangogo saka ibaji ENPO-i magizüker, ta Kuzholuzo Nienu-isa shisem.

Taoba ita MHA teshimtet

telok kati Nagaland semdangdang ENPO tesem atema state balaka magütsütsü ta shiogo, ta paisa ashi.

Tanü cabinet senden nung ENPO MLA tem aden aser idangji parnok dang takhangba meyipa reprangshitsü shiogo ta MLA Kuzholuzo-i ashi.

Parnok indang tongti taginübaji terenlok aser senotsü teyari lir aser state sorkari ibaji agütsütsü. Parnoki akhangbaji tim dang aser angadangtsüla saka Naga nung lemsatsüسابо meinyaksüla. MHA-i ENPO den taruba senden amendang tajung kar adoktsü imlar, ta paisa metetdaksü.

Nagaland DGP T John Longkumer-i mapa nungi sodi agiba sülen DGP tasen shimtsü atema telemtetba agi asü magi ta osangbeneri asüngdangdang "tanü senden nung T John Longkumer-i shidi züluba agizüksü lemtetba dak alaka tanga telemtetba kecha magi" ta Kronu aser Nienu nati ashi.

Nagaland nung senior most official Rupin Sharma-i DGP inyaksü akok ta tenaprongi ashi.

## Amit Shah-i January nung state 11 semdangtsü

**New Delhi, January 3, 2023 (Agencies):** BJP lennir tejen aser Union Home Minister Amit Shah-i tan ita state 11 tashi semdanga senzütsü. Iba ya BJP indang "Lok Sabha Prawas" programme nung shilem ka ama lir.

2024 general election matongdang parliamentary constituencies nung lenmang sadema lapoktsü nükjidong nung iba sentong agir.

Amit Shah-i January 5 nü Tripura semdangtsü aser

January 6 nü Manipur o Nagaland semdangtsü. Iba sülen pai January 7 nü Chhattisgarh o Jharkhand aser January 8 nü Andhra Pradesh semdangtsü ta BJP osang kar ajanga ashi.

Maneni, January 16 nü pai Uttar Pradesh, January 17 nü West Bengal, January 28 nü Karnataka aser January 29 nü Haryana o Punjab semdangtsü ta party osang ajangasa ashi.

Amit Shah ya BJP atema election strategist tongti ka lir

aser 2014 nungi Prime Minister Narendra Modi lenisüba kübok Amit Shah-i state balala nung BJP sorkartem akümba nung tongti shilem agia arur.

BJP-i parliamentary constituencies 160 ajioka lir aser item rongnung 2019 nung parnok tamakok anguba constituency teimba dena lir. Item tesem nung BJP tashi itshiba ajanga taruba election nung parnok takok angutsü ta amanger.

## NTC-i state sorkar dang SAPO yaritsü ayongzük

**Dimapur, January 3, 2023 (TYO):** 2000 küm nungi Southern Angami Public Organization (SAPO) aser Mao Council tsüngda ali tsütsü mepetmesütepa aruba atema tebilemstü abener ta Nagaland Tribes Council (NTC)-i ashi.

"Iba ken o atema kin hohotem aser NGOs-i SAPO o Mao Council tsüngda alemi nungi tesentaktep tajung aliba ama akangshiteptsü atema merangdanga arur saka makoker. Osangkakettem nung telok anatsüleni sangdong balala agütsüba angudang iba ken o junga mangatettepa ajiteter aser khenkhen SAPO-i parnok ali meshia nübortem senzüsenbongba noktanga lungkak aitba tensa ajurur" ta Media Cell, NTC-i sangdong ka nung ashi.

Nagaland aser Manipur state tem nungi SAPO aser Mao Council tsüngda ken o adoka

jembiake state sorkari ola madokba atema mepelar. Manipur sorkaribo iba tesem nung SAPO nung senzüba noktangtsü atema Armed Police indang outpost ka amenokogo saka Nagaland sorkaribo pei nübortem kümzüka ayutsü atema mapa inyakba manngur, ta NTC-i ashi.

Iba ken o ya Naga nung kin ana tsüngda lir ajisüaka kin ka Nagaland state nungi aser ka Manipur state nungi lir aser iba ali ya state ana arrtsü nung lir. Nagaland arrtsü ken o tem ya Constitutional & political issue ka lir aser iba ya Constitution of India nung Arrla 3 aser 4 nung ajemdaker inyaksü nüngdaker, ta NTC-isa metetdaksü.

Nagaland state sorkari sobaliba nung ajemdaker iba state arrtsü ken o ya India sorkar ajanga Manipur sorkar den angatetteptsüla, ta NTC-isa ashi. "Nagaland ya state ka lir aser

arrtsü shitak meladangi state mesüra linük ka akümtsü makok. Ali ya Tsüngremi poktetdaksüba lir aser meimchiri inch ka danga yanglutsü makok. State ka indang arrtsüji sobaliba aser akhidang nungi lemsüka aruba ali nung ajemdaker ladanger. Naga nung ajak longjemtsü taginüba teti pusema nungiter saka Nagaland nung alirtem indang ali tangar nem magütsütsü" ta Media Cell, NTC-isa sangdong nung metetdaksü.

Nagaland sorkari NGO(s) sülen atsükoka melii SAPO-i Kezolta aser Dzükou tesemtem nung ali kibur kuli agütsüba pusema nungitsüla. State sorkari ashishitep adoka aliba tesemtem nung Nagaland Armed Police post amenoktsü mekokra SAPO nung kümzüka ayutsü atema Manipur state sorkar dang iba tesem nungi Armed Police post agentsü atema takhangba agütsütsü tim, ta NTC-isa ashi.

## Advisor S. Keoshu-i kaketshir dang temolung agüja azüngtsü ayongzük



Advisor S. Keoshu-i Sukimi Students Union Golden Jubilee mong nung o jembiba angur.

**Dimapur, Aenjeti/January 03 (TYO):** Sukimi Students Union pur December 28, 2022 nü Hon Jubilee (1972-2022) amungdang Advisor, IPR & VG, Government of Nagaland, S. Keoshu Yimkhiung-i moaja liasü.

Iba alizüng tongtetba asoshi Keoshu Yimkhiung-i Jubilee committee, kaketshir aser Sekiur B (Sukimi) nung nübur ajunga den tepela lemsatepa liasü.

Kaket reju tenzüker aser tamale inyaka aruba ketdangpur nem pai tenüngsang agütsü aser parnoki bendanga agütsür inyakba ajanga kakeshir ajangzüka tanü tashi nokdaka lir, ta ashi.

Sekiur B nungi Sumi nung

nem mapa nung shilem ana wazüka yutsüba atema pai state sorkar dang pelaba lemsatep, aser ibai nüburtemi mapang talangka nungi khanga liasü, ta ashi.

Pai Sekiur B nung aliba Sumi nung dang tajungtiba nung amalitep akatsü nangzük aser parnoki timtem ajurubatem pa den lemsatepsü asoshi aser pai akokba lenmang nung yaritepsü, ta shia liasü.

Advisor Yimkhiung-i kaketshir dang bendanga agütsür azüngtsü aser academic career nung tali temolung agüja züngser pei nükjidong tongtetsü ayongzüka liasü.

Tesüiba mapang ama masü backdoor appointment ya

meinyaktsüla aser meinyaktetsü, kechiaser sorkar mapa asoshi nübu shimtsü atema state sorkari NSSB ya benok, anungji tajungtiba aser tetemjenba candidate nem maongka agütsütsü, ta pai ashi.

Anungji shinga daka metaloka melie tajungtiba nung inyakttsüla, ta pai ashi.

Sekiur B ya süngjang-lijang aser aonsotsü jenti adoktsüsa tesem ka asünung, pai rongsenketzüng lenmang balala indanga jembiba liasü.

Paisa Sumi aser Yimkhiung nung ya akhi mapang nungi adianu am alia aru, ta ashi aser tarutsü anogotem nunga adianu ama maneni telungjem wazüka ayutsü pai ayongzüka liasü.

## Singrep Village Students' Union pur Hon Jubilee mungogo

**Dimapur, Aenjeti/January 03 (TYO):** Singrep Village Students' Union pur Hon Jubilee benjongmung December 27 nungi 29, 2022 anogotem munga liasü, kong Rev. Y Imtiba Executive Secretary USBLA Yangli aser ENPO tir R Tsapikyu Sangtam nungertemi jubilee nüngshilong sayaja liasü.

USSC tatong tir Sethrongba-i yimdaklir aser kaketshir dang yimjung aser tesunep nung alitsü ajungshi aser yimtsüng nung tesunep

asir yimchi-yimjung tenzükdaktsürji kaketshir tentet asütsüla, ta ashi.

Yimtsüng nung tesunep aser telungjem lira terenlok maparen balala arutsü, ta R Tsapikyu Sangtam-ia ashi.

Pai yimtsüng nung tebu-teti nung dang tetsür temeden asoshi rangloker inyakttsü ajungshia liasü.

Tetsür ka azüngtsü-zülutsü junga meteta lira la ajanga tarutsü putu yimchi-yimjunga alitsü, ta pai ashi.

Iba hon jubilee ya terenlok, shisaliok mesüra yimtsüng ketdangsüba tsütsü temoatsü züngdangba mapang aser Tsüngremi yimtsüng dang temeim tanen makai sayuba asoshi pelar ta ashiba mapang lir, ta pai ashi.

Telungjem temaitsü Singrep Village Students' Union tir-i ENPO tir nem sü (Mithun) ka agüja liasü.

Iba sentong nung Singrep Village Students Union ajanga shilem balala agia liasü.

## AR Shamatore Battalion ajanga tanurtem asoshi mini carnival ayongzük



**Dimapur, Aenjeti/January 03 (TYO):** HQ IGAR (North) kübok Assam Rifles, Shamator Battalion ajanga December 24, 2022 nü Christmas tenüng nung Dan, Pangsha aser New Pangsha Village nung tanurtem asoshi Mini Carnival ka ayongzüka liasü aser

tajemzükba jenjang nung aliba tanurtem nem sempet lema agüja liasü.

Company Operating Base Dan nungi parnoki Area of Responsibility of Dan Company Operating Base nung makamait tia nung alir yaritsü asoshi tanen makai maparen balala inyaka arur.

Yamaji parnoki mini carnival ya ayongzüka Christmas mapang tanurtem peladaktsütsü asoshi 50m race, Cock fight, Jalebi race, Sack Race & Volleyball asayadakja liasü.

Assam Rifles temi iba ama mapa tajung inyakba ya nüburtem pela agizüka liasü.

## DC Tuensang ajanga Arms License alirtem dang metetdaksür

**Dimapur, Aenjeti/January 03 (TYO):** Deputy Commissioner (DC) & District Election Officer (DEO) Tuensang, Nokchasashi ajanga sangdong ka nung ashiba agi, 14th Nagaland Legislative Assembly 2023 atema general election mechi Arms Rules, 2016 indang Rules 30 aser 112 nung shia aliba ama Tuensang district nung licensee temi yua aliba prangbong aser injang jangjaba alitsü.

Anungji Tuensang district kübok arms license alir ajak dang January 20, 2023 tashinung anepdang 9:00 nungi nikongdang

3:00 tsingta pei Police Station nung arms/ammunition aser license booklet bener oa sayutsü metetdaksür, ta sangdong ajanga ashi.

Yamaji meinyakertem indang arms license agientsütsü aser ozüng kübok tapet temerenshi alitsü.

Police station shia officer-in-charge temi Name of License Holder, License Number, UIN Number, type of arms & No, license last renewed date, aser No. of ammunition tem indang tejangja excel format nung yanglua agütsütsü.

## Phek nung E/Roll atema senden amen



Secretary for Excise & E/Roll Observer for Phek District, Kevekha Kevin Zehol-i December 19, 2022 nü Phek semdangba mapang tangokba noksa angur.

**Dimapur, Aenjeti/January 03 (TYO):** Secretary to Government of Nagaland for Excise & E/Roll Observer for Phek District, Kevekha Kevin Zehol-i December 19, 2022 nü Phek semdanga political party ajak den senden ka Deputy Commissioner & DEO Phek indang office chamber nung mena liasü.

Iba senden nung jembidang Kevin-i district nung aliba political party lenirtem dang clean electoral roll amshiba nung amalitep akatsü ajungshi aser pei temeden vote indang awareness agütsüba nung yaritsü ayongzüka liasü.

Secretary-i voters tasentem dang maongka agia election nung shilem agitsü ayongzüka liasü.

Iba senden nung Deputy Commissioner & DEO Phek, Kumar Ramnikant, IAS ajanga

iba senden nung jembidang clean electoral roll atema political party temi tongti shilem agir, ta ashi.

Anungji pai party lenirtem dang duplicate voters tem indoktsü nenshia ashi aser vote agütsütsü temsüa alir ajak tenüng zülüoka pei indang EPIC tem pei sasa Aadhaar number den sendaktepsü ayongzüka liasü.

ADC & ERO Phek, T. Moa Lemtor-ia district nung tenüng mesüra noksa kasa-sa inoka aliba tebilemstü lemsatep aser iba atema ERO-i political party balala lenirtem dang district nung jangjashiba maparen nung yaritepsü ayongzüka liasü.

Senden amenba sülen Zehol-i 19th Phek Assembly Constituency kübok polling station (Chosaba aser Phek village) semdanga BLOs aser putu menden züngsemtem den sensaksem kaa liasü.

## Assam College principal-i sen tim mesüi amshiba atema apu

**Boko, January 3, 2023 (Agencies):** Assam college ka nung ex-principal ka pur Boko Police Station-i anir aru.


Sontoli Anchalik College nung vice president Mubarak Hussain-i shidi ka züluba nung ajemdaker Sontoli Anchalik College nung ex-principal Abdul Kalam Ajad apu.

"Onoki tanep ex-principal aser Rabiul Hussain ta ser fourth-grade staff member ka puogo. Tenaprong tepuokdak yua lir" ta Boko PS OC Phanindra Chandra Nath-i ashi.

Ex-principal Abdul Kalam Ajad-i Rs 31.8 lakh shi college infrastructure funds tim mesüi amshiba nung shilem agiogo aser pai iba sen indang kuli magütsüteter, ta OC Nath-i ashi.

"Ajad anema tang ya mezüngbuba ken o masü. Tang college nung principal teinyakdak Dr Tapan Dutta-ia Ajad anema ken o ka benoka lir. Abdul Kalam Azad-i minority students scholarship nunga tim mesüi inyakba ken o benoka lir" ta Nath-i metetdaksü.

# 'India-i tangar linük indang ali inch ka danga magi': Rajnath



**New Delhi, Aenjeti/January 3 (Agencies):** India Army aser Chinese People's Liberation Army (PLA) na taoba ita arrtsü nung mangatetep adokba sülen Arunachal Pradesh mezüing semdangba mapang defence minister Rajnath Singh-i Mongolbarnü ashiba agi, India-i kodanga rongrong atoktsü atema inyaksangshi masür mesüra tang tashi nung rara ka danga tenzüka mali.

"India-i tang tashi nung rara ka danga tenzüka mali mesüra tangar litsü inch ka danga agia mali. Kari danga yimjung nung alitsü merangba ya tashi mait ka ama bilemra ni parnok dang ya shiner; onoki yimjung dak amanger saka tashi amshiti süra onokia amshitettsü," ta Singh-i ashi.

Arrtsü nung aliba Siang district kübok Along-Yinkiong lenmang nung Siyom apu semzüka sentong nung o jembiba mapang defence minister-i, "onoki rara dak tamang maker saka kari danga rongshira onoki onok tashi ajak agi telangzüba agütsüogo aser maneni yamaji inyaktüsü," ta ashi.

Singh-isa, India armed forces tem rara tema teti renema lir, ta ashi.

"Alima ajunga nung tesem balala aika nung mepetmesü adoker. Alima aser mapang melenshiba den linüktem tejangraba melenshia aoba temulungdang yur linük kümzüka ayutsüji linük ajak atema mapa tongtibangtiba kümogo," ta Singh-i ashi.

Meter 100 talang Siyom apu

ya defence force tem atema kanga tongtibang lir, kechiyong iba ajanga sepaitem, oset tulu aser mechanised vehicle tem Upper Siang district, Tuting aser Yinkiong Region kübok tesem balalai kara kara bener otettsü aser iba ajanga iba tesem loktiliba aser rongsenketzüng renlochtsü.

Singh-i Mongolbarnü Border Roads Organisation (BRO) indang infrastructure projects 28 amenokja liasü.

Project 28 rongnung Jammu & Kashmir nung apu pongu, Ladakh nung apu ti, Uttarakhand nung apu ana Sikkim nung apu asem, Arunachal Pradesh nung apu pezü aser J&K, Uttarakhand aser Arunachal Pradesh nung lenmang kaka densema lir.

Kasa mapang nung arrtsü nung aliba tesemtem terenlok asoshi Border Roads Organisation (BRO)-i bendanga agüja inyakba atema Singh-i parnok nem tenüsang agüja liasü.

Defence minister-isa, Mizoram, aser Ladakh UT nung telemedicine asem semzüksü aser BRO indang technology tasentem indang compendium ka sayaja liasü.

# Dhangri amakertem indang osang agütsür-tem nem senpet agütsütsü police-i nangzük

**New Delhi, Aenjeti/January 3 (Agencies):** Iba hopta Jammu & Kashmir (J&K) nung Rajouri kübok Dhangri nung arishi küm 4 tenur ka densema civilian trok tepsetertem indang osang agütsürtem nem senpet sen lakh 10 agütsütsü police-i Mongolbarnü nangzükogo. Anogo ana tashi atonga amakba tesem ya federal National Investigation Agency (NIA) team kati semdangogo.

Mejangjaba kiralongrartemi Deobarnü Deepak Kumar, 23, Satish Kumar, 45, Pritam Pal, 56, aser Shiv Pal, 32 tepseta liasü. Iba sülen anogo ka lir Vihan Sharma, 4 and Samiksha Sharma, 16 nata Deobarnü khatapba tesem anasa improvised explosive device (IED) ka apokba sülen pokseta liasü.

J&K Police tekolakba Dilbag Singh aser Bharatiya Janata Party (BJP) lenir Ravinder Raina na densema lendong nung asür nisung trok arongba sentong nung nüburtem noklang aikati shilem agia liasü.

Iba tesem nung alirtemi police aitsüogo aser ashiba agi, kiralongrartemi IED ya Deobarnü rema toktsü saka police temi bushisüngdanga aoba mapang bomb rema aliba ya meputet. Dhangri yimtsüng tekolakba Dheeraj Sharma-i, iba ya aibelen tulu ka ta shiogo. "Lokti nung nütsüng agi ajema aliba teloktem tetsübu nung alir. Ketdangsurtemi jenjang tesashi agitsü nüngdaker," ta pai ashi.

Iba tesem nung alir katisa, Deobarnü amakba ki asem nung kechiba kanga junga bushisüngdang masü. "Kitem kanga junga meita ao asübo IED tokja aliba poteter lila," ta pai ashi.

Police temi ashiba agi, IED ya Pritam Pal'er kikümtong nung toktsür liasü. "Kiralongrartem shirnoki Deobar nikongtsütsü ki asem maka liasü parnok jena mao tsüingda IED ya toktsü asütsü. IED dak timer keta liasü aser iba ya Deobar nikongtsütsü parnoki mezüngbuba amakba kikümtong nung toktsür liasü," ta police ketdangsur kati ashi.

Lieutenant governor Manoj Sinha-i Hombarnü Dhangri semdangogo. "Iba ya kanga temulung raksatsü aser tia maka tatalokba ka lir. Kiralongrar ajunga meshi meshia samatsütsü atema Centre aser J&K sorkar mulungteter lir. Asürtem meyipa anir marutettsü, saka asür kinungertem nem takokba tashi teyari agütsütsü ta ni nangzük. Onoki security forces nem tashi ajak agütsüogo aser iba tesem amakertem nem yakta temerenshi agütsütsü, ta nüburtem nem tenangzükba agütsür," ta pai ashi.

Paisa, asür kinungertem nem teyari sen lakh 10 (kibongshia) aser mapa agütsü aser lendong nung yirur parnok 15 nem sen lakh kaka agütsütsü telemtetba agiba sangdonga liasü.

# Vande Bharat Express dak long agi aonba bushisüngdangtsüla; BJP

**Malda, Aenjeti/January 3 (Agencies):** Howrah-New Jalpaiguri Vande Bharat Express senzü tenzüker anogo ishika dang lir West Bengal kübok Malda district nung iba train dak long agi aon aser iba ajanga BJP-i ken o ya NIA nem bushisüngdangdaksütsü khangogo.

Iba tatalokba ya Malda jila nungi km 50 pilar Kumarganj railway station anasa Hombar nikongtsütsü ataloka liasü, ajisüaka nisung yiruba osangbo kecha mali, ta Railway ketdangsur kati ashi.

22303 Vande Bharat Express nung coach number C13 indang glass kishi raksa, ta pai ashi.

Kumarganj ya Northeast

Frontier Railway (NFR), Katihar division küboki aiter.

Lendong atalokba sülen iba train ya ken danga manen aser Malda jila railway station nung dang anena liasü, ta ketdangsurü ashi. Malda Town railway station Government Railway Police (GRP) IC Prashant Rai-i ashiba agi, Railway Protection Force (RPF)-i iba ken o ya bushisüngdangdar.

Iba train ya Ato Kilonser Narendra Modi-i December 30 nü Howrah station nungi virtually tenzüka liasü.

West Bengal Assembly nung Opposition lenir aser BJP lenir Suwendu Adhikari-i, iba tatalokba ya Howrah station nung train tenzüksüba mapang

'Jai Shree Ram' ya yimyim ayimba atema mang ayangba ka asü ta bilemba lemsatetep.

Train tenzüksüba sentong nung BJP züngsemtemi 'Jai Shree Ram' ta yimyim ayima liasü aser ibayongji Chief Minister Mamata Banerjee-i train tenzüksüba sabang nung tua mamentsü atema telemtetba agia liasü.

Railway Minister Ashwini Vaishnaw aser Governor C V Ananda Bose nati la sabangi tua mendaktsütsü atema merangdang ajisüaka pa nüburtem den dang mena liasü.

Iba tatalokba ajanga mepetmesü adokogo aser sorkar sentong ka nung "political slogans" amshiba Trinamool Congress-i aija liasü.

# Karnataka nung Gujarat model menüngdaker: DK Shivakumar

**Bengaluru, Aenjeti/January 3 (Agencies):** Karnataka Congress tekolakba DK Shivakumar-i Mongolbarnü ashiba agi, Bengaluru nung amendaker aliba shishilembar ka soseta asüba ken o nung MLA Aravind Limbavali-a densema lir ta ashiba ya Bharatiya Janata Party-i kümzüka ayutsü memarangtsüla.

Deobarnü Bengaluru nung amendaker aliba arishi küm 47 tain shishilembar ka pa indang gari telung nung pasasa khaseta asü, ta police-i ashi.

Asüsang ya Pradeep S ta jangjaogo. Pai pa soseta asütsüsa aküm kuli ya English nung kaket tubak ti nung zülutsür liasü aser pai iba jenjang agiba ya BJP MLA Aravind Limbavali densema parnok trok dak tai tonglochtsü. Pradeep ya Kaggalipura nung pasasa khaseta asü.

Union home minister Amit Shah-i tawa Mandya nung milk cooperatives ana indang jembiba dak sendakba nung Shivakumar-i, "ni Amit Shah-i jembiba o ya magizüker. Pai Karnataka nung BJP pur

lenir ka danga mali ta kuli agütsüogo. Amit Shah aser Modi na Karnataka-i arujen arur, Karnataka nung BJP pur lenir ka danga mali," ta ashi.

"Tawa Amit Shah Karnataka-i aruba mapang pai Amul aser Nandini indang jembio, onoki Amul technology menüngdaker, onok indang Nandini ya ajak dang tajungba, Karnataka modle tajungba, onoki Karnataka nung Gujarat model menüngdaker," ta pai shisem.

Hokolbarnü Amit Shah-i Bengaluru nung linük nung mamatzü producer tem ajangzükdaksütsü atema Amul aser Nandini na longjemer inyaktüsü shidanga liasü.

Ajisüaka Deobarnü cooperation minister S T Somashekar-i iba olen jangjashitsüogo aser ashiba agi, HM-i Karnataka Milk Federation (KMF) aser Gujarat-based Anand Milk Union Ltd (AMUL) na longjemtsüba indang jembiba masü.

Deobarnü Karnataka chief minister Basavaraj Bommai-i Shah pusema jembia ashiba agi, Nandini Dairy ya tarutsü nung kija dang inyaksangshitsü.

Bommai-i osang benertem dang ashiba agi, Nandini aser AMUL na longjemtsüba tibelemdangba ya tai lir.

<b>केनरा बैंक Canara Bank</b> <small>INCORPORATED IN INDIA</small> 		<b>POSSESSION NOTICE</b> (For Immovable Property)		<b>REGIONAL OFFICE, GUWAHATI</b> 2nd Floor, Mayfair Building, Jotikuchi, Opp. Hanuman Mandir, Lokhra Road, Guwahati, PIN-781034, Assam	
Financial Assets and Enforcement of Security Interest Act, 2002, (Act 54 of 2002) kübok Securitization And Reconstruction aser security interest (Enforcement) Rules, 2002 kübok sec 13(12), rule 3 nung tashi agüja aliba dak ajemdaker Canara Bank indang Authorized officers ama Sen apur/ Guarantors/Mortgagors tem dang notice nung shisema aliba sen osang agütsüba sülen anogo 60 tsüingda aotsü tetuyuba agütsür. Accounts indang osang tejangja teküboklen shisema lir.					
Sen apur/Guarantors temi sen maotet anungji sen apur aser nüburtem dang, Act section 13(4) aser rule 8 & 9 nung tashi agüja aliba dak ajemdaker teküboklen agüja aliba anogotem nung bank-i teküboklen agüja aliba kiojen aser ali kimong agiba metetdaksür.					
Sen apur/ Guarantors aser nüburtem dang teküboklen agüja aliba kiojen aser ali kimong dak sendakba nung kecha inyaksangshi masütsü metetdaksür. Kari danga item kiojen aser ali kimong dak sendakba nung inyaksangshi süra Canara Bank aser parnok kübokkongsangtemi teküboklen agüja aliba sen aser tetemlok agitsü.					
Sen apurtem dang iba Act Section 13 (8) dak ajemdaker atakzükja aliba mapang tsüingda kiojen aser ali kimong meyipa agitsü jaoker.					
<b>A) Name of the Borrowers/ Guarantors / Mortgagors</b> <b>B) Branch Name</b>	<b>Liability As per Demand Notice Date</b>	<b>A) Date of Demand Notice</b> <b>B) Date of Possession</b>	<b>Details of the Property Mortgaged to the Bank</b>		
<b>(A) Kavitho V Yephthomi, Proprietor of M/s. Tizu Trade Agency</b> <b>(B) DIMAPUR- II</b>	<b>Rs.46,65,820.80</b> (Rupees forty six lakhs sixty five thousand eight hundred twenty and eighty paise only) and interest thereon and cost.	<b>A) 20.08.2022</b> <b>B) 30.12.2022</b>	<b>Sri Kavito V Yephthomi</b> tenüng nung Dag No.-142/505 of Patta No.- 430, Block- Dubagaon under Mouza No-3, District- Dimapur agi ayimjema aliba ali tasazük <b>01B-02K-13Ls.</b> Arrtsü (As per LSR)- <b>North:-</b> Main Road and Mr. Zekheto, <b>South :-</b> Mr. Vinizhe, <b>East:-</b> Main Road, <b>West:-</b> Mrs. Shela.		
<b>(A) Mrs. Chinglei Ningshen, Proprietor of M/s. Zingron</b> <b>(B) DIMAPUR- II</b>	<b>Rs.32,05,128.24</b> (Rupees thirty two lakhs five thousand one hundred twenty eight and twenty four paise only) and interest thereon and cost.	<b>A) 10.10.2022</b> <b>B) 30.12.2022</b>	<b>Sri Lawrence Jamang</b> tenüng nung Diezephe Village under Mouza No.03, Block Diezephe in the District- Dimapur nung Patta No.268 agi ayimjemaaliba ali tasazük <b>01B-00K-00Ls.</b> Arrtsü (As per LSR) - <b>North:</b> Mr. Akho, <b>South:</b> Intending mortgagor's land in different patta, <b>East:</b> Mrs. Chinglei Jamang, <b>West:</b> Road.		
Date: 30.12.2022, Place: Dimapur					
Authorized Officer, CANARA BANK					



## TIR YIMYIM YIMOBILEM (EDITORIAL)

DIMAPUR RASEMNÜ, AENJETI (JANUARY) 04, 2022

### Temelenshiba küm ka asütsü

**A**senok asoshi junger majung ka, taküm 2023 küm ya election küm lir. Ibaji junger, kechiyong nübortem asoshi yimsüsürtem shimtsü maongka tuluka angur asütsü saka külenbo majung, kechiyong asenoki ochi nung sünepsünepa election agi mashi, anungji election agitsüba anogo mesangdong aser memetet dang yongi azü poka raratep tenzüker. Ajisüaka, election otsüji yutsür asenok asoshi teratatsü kaji, Nagaland anüdoklen alir kintemi parnok nem state balaka razüka magütsü tashi tang aliba Nagaland election nung shilem magitsü ta ajangajanga metetdaksüogo. Atangji, parnoki nokdakbaji tim dang, kechiyong Nagaland election nung shilem agi tashibo Nagaland nungi pilatsü makoktsü. Aji oda, parnoki lemtetba ama parnok kübok aliba constituency 20 nung election magira, tanünga constituency 40 nungjia magitsüsa akümstsü, anungji ashiko mapang tatsükabo Nagaland ya President's Rule nung ayutsüa akok. Atangji, tang aliba Nagaland agi state ta masü Union Territory ana aküma malang, ajisüaka melinüra kangshia külemi alitsübaji jangramatem ka lir, anungji Jammu & Kashmir agi Union Territory ana kümstsüba ama, ashiko PR agüja atadang, center government-ibo melamelaa kümstsüsüa akok. Shitakba Naga nunger tejangraba aser taginübajibo tang aliba Nagaland agi ana akümstsüba masü saka tang Nagaland nung dena maliba Naga nunger lushi ajak Naga yimten ka küboki aitdaksür külemi alitsü asoshi jembia arur. Iba tejangraba aser temetenji mapa kuma inyaksü asoshi Nagaland akümstsü atema tangatetep yangluba onük 16, koba dang 16 Point Agreement ta ajar, iba nungjia shisema lir aser iba kasa telemtetbaji mapa kuma inyaksü asoshi Nagaland nung government aküm shia assembly nung pangzüng kuma latetshir. Atangji, Nagaland nungi razüka state balaka akümstsübajia Nagaland government ajanga dang kümstetsü, ajisüaka tang tashibo Nagaland state assembly nung Eastern Nagaland purtemi Frontier Nagaland state tasen ka akümstsü lemtetba indangbo jembia mangashi aser center government-ia Nagaland state dang tebilemba asüngdangbabo memetet. Aji oda, tang tashibo Nagaland state government majangi ENPO aser center government na dang ajurutepa jembiba angashir. Nangzükba ama, tang January nungsa Nagaland-i kilo kilonser Amit Shah aser ato kilonser Narendra Modi na prongla Nagaland-i arutsü osang lir. Nagaland state ama tilakati ato kilonser o kilo kilonser na prongla arubaji odangbo masü. Tenati temelenshi kabosa bener arutsü. Iba temelenshi Nagaland agi ana akümstsü asü, mesüra Naga yimten tebilemstsü ken o ya tatem kuma lemtetsü asü, mesüra Nagaland for Christ melen Nagaland for Hindutva asütsü atema sentong kar metetdaksütsü. Koba temelenshi arudir arung, iba temelenshi jagi Naga nunger akoksatsüsa masü saka ajangzüksüsa inyaksü atema asenok dak tangatetba alitsü nungdaker. Atangji, Naga yimten tebilemstsü ya yamai mesangdaka meyui yakta telemtetba kati arur asünungbo, Nagaland agi ana akümstsüba tebilemstsü otsü ya mejembila. Ajisüaka, shibaibo atatetsü ? Iba jagi timtem aser takoksa marem kasa Nagaland nung alir Naga nungersa süaka anüdoklen alirtemi ola adoker. Aji oda, tang amai state-bo ka dang saka terenlok mapatem agi matonger aser lokti tentet ka nung danga Naga nunger kin ajak longjema madenshitetter ta süra, Naga nungerbo Naga nungersa asütsüji, state balala ser pei pei yari pei state nung yimkong ajungtsü atema bilema inyaka ali tajungba asütsü. Asenok onsara tali mashiba agi, joko center sorkar den asen temeten jembitsüa asenok dak tashi mali aser tasüa mait kümogo. Aji oda, tangbo center government nung alirtemi kechi shidir aji angatsüsa akümer, kechiyong tashi mangara asenoki menaba temenen yari parnoki merenshitsu. Iba ama tensa tia ka nung asenoki süngyanglu tsüngdang apudakra, Yisu tenüng tetshia Naga yimten temeten asoshi nokdak dang reshikangshi, maksü aser takoksa ajuruba ajak to amajok akümstsü. Atangji, taküm küm ya temelenshibo arulanglang, anungji iba temelenshi jagi Naga nunger ya tangar India nungertem dang nungibo shitakba balakata ta asütsüsa tangatetba takang aser tajung asenok mapa agi sayutetsüla.

## OLEMSABANG

### Onük: Ochishir nisungji shiba ( Who is the honest man )

~ Toshi, Kohima

Ashikülak mali temulungsentsü temerük atenba nisung dangji Ochishir nisung ta ajar. Tanü putu nung asen nisungtem reprangdangra tebang agibo o tanang jembir saka temulung nungbo ashikülak aser mokokaji agi sünga lir.

Ya kechiba ta bushidang nung tenung agi khristan saka Khrista makaba nisung jenti asenok rongnung sotetba ajanga lir.

Yisu Khrista osang tajung marudang obula otsüla nunger mapang teyanglur Tsüngremi parnok temulungjang nung tangatetba ka agütsü. Ibaji parnoki Meyotsüngba tsüngrem, longkitsüngba tsüngrem aser anungtsüngba tsüngremi asenok meimchir ajak ya repringdar ta amang. Anungji parnoki ochishia ali. Ashikülak, yazü auyar, nüktapangta, nisung tepseter aser ochimashi inyakertem ajak asüyim nung meyotsüngbar kima o bendangtsü ta parnoki amang. Anungji ochishia ali. Iba temoatsü tanu tashi parnok semchisemnur temoatsü nung azükarua liadgi. Aji asenok ajak tenük küli lir.

Aolimai Yisu Khrista osang tajung arur küm 150 ajungba SOC asenoki munguogo. Küm paikaji amanga aruba nisungtem rongnungi kwika kotaki ogo aser tang taküm alir rongnunga kwika kotaki aotsü ta kanga tang aroka shisadangtsü mapang tongja tongogo.

1964 nung election koda agi aji ni memetet kechiaser ni tanur ka tang liasü. Sakani angashiba agi MLA ajak ochishia ali. Parnok mapang leman tajungtiba yanglutsü merang. India nungi aruba sen timi amshi aser parnoki meyimzuka agitsü memerang. Ibajagi küm ka nung aruba sen mamshimabaji taruba küm inoksemer amshitsü yutsü ta jembiba ni angshi. Ibaji ochishir MLA aliba mapang.

Iba sülen 1969 nung tanabuba elecion aru. Ibajibo nia nguogo. Iba mapang nunga election mapang meraratep, pelateba pei vote shiba nem agütsünur iba nisung nemji agütsü. Shibai tajungba inyak pa adok. Yamaji pelateba lia aru.

Iba tashi Naga lima nung election mapang kecha raratep maliasü. MLA aser Minister-temia akok tashi pei constituency nung terenlok mapa bener arua inyak. Aji saka 1980 tetenzüklen nungi Nagaland nung election mopong balaka onmeso.Yi, sen, nüktapangta aser jabujari agi election nüboyim tenzük. Anungji yi agi mesüper züktep tenzük. Ki raksatsü, car rongdoktsü aser vote rakzük. Idangji tetsübu agi sannukertema kechiang mesayangteti tsüani sayutetba kü santemtu yamaidang aküm nu ta temulung shiranga liasü.

Tanubo asen lima nung election ya shishilembaba mapa ka amaitang kümogo. Kü dangi medemer kati whatsapp nung MLA sale purchase ta Punjabi nungeri yangluba video ka yok. Aji ngua kanga menünua repring. Yangji asen nübura tangazüksü jendi lir.

Nagaland Public Service Commission nung ochi mashi inyaker ta nüburi jembia. Anungji sorkari Theologian ka member shim. Saka tebu keleni shi mongozüktet ama pa kisüng ochi ashiba agi kecha temelenshi bener marutet. Anungji Chairman-ji Theologian ka shim. Paia kecha balaka temelenshi bener marutet.

Nuburtemi elecion nübuyim nung Tsüngrem meteter shimtsüla ta ayimoktsü. Anungji Tsüngrem meteter kar shim. Ajisüaka Tsüngrem metetaka taküm nung Khrista makaji kecha balaka temelenshi bener marutet. Iba nungjagi asenoki Tsüngrem metetba aser Khrista akaba anaji bendanga metetogo. 2023 election nunga Tsüngrem meteter asü Khristan kar shimtsü asenoki kanga junga bilemdangdi. Tsüngremjibo yi ajemertmia meteta lir. Mojingia Tsüngremji meteta lir kechiasr mojingji Tsüngremi Kotak nungi ajemzuka yoker alima nung alir.

Election nung nubuyimer kar dang kechiba election maang Minister dang sen meshia agir ta asüngdang. MLA shia küm nung Rs 1.50 crore Local Area Development atema agütsür. Iba nungjagi pai tenük mozü nutsür ama küm pongu nung terara lema agütsür ayuba election mapang alemerji aji pa sen masü asenok public sen. Ibaji lema agibaji kechi tai aka ta ashir. Anungji Laishirtemia mesüra sannükertemia yangji kechi ashitsü?

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Pope Benedict XVI arishi kum 95 nung süogo



**Vatican, Aenjeti/January 03 (Agencies):** Pope Emeritus, Benedict XVI arishi kum 95 nung December 31, 2022 nü Vatican City nung süogo. Pa temang kanga kera mejungi kuma asü, ta osang ajanga ashir.

Pope Benedict XVI ya aikati akhi tejen yimya amshir aser conservative lenir aser theologian ka ama züingshir aser February 11, 2013 nü Catholic arogotem aoksa pope mapa yuja liasü.

St. Louis Post-Dispatch ajanga ashiba agi, Catholic nung lenir kum 600 jungnüa nung masü tashi yimsü asüba yimya raksabaji pa ya mezüngbuba putir lir.

Ajisüaka Pope Benedict XVI ya arishi kum 85 nung mapa nungi anentsü sangdong aser pa arishi nung tain akumba ajanga Catholic arogo junga maniteter, ta shia liasü.

Aikati iba otsü ya tesüngmangtsüka aser mechimenen ama ajiter, saka Pope Benedict XVI asüba sülen aikati pa bukuma nokdaker.

Nigeria nung tir asoshi tokteper aser taoba mapang Anambra State nung governor inyaksang Peter Obi-i tweet ka

nung, "Tatem salem Pope Emeritus, Pope Benedict XVI. Pope Benedict ya Tsüngrem nisung asoshi shidakba sannüker ka liasü. Pai amatsü makokba otsü tajung jenti yutsüogo. Putir, Archbishop, Cardinal aser Pope ka ama pai Tsüngrem aser meimchir tenzüka ya pai Tsüngrem meimba den sako lir," ta zülutsü.

LifeNews.com-ia Pope Benedict XVI indang conservative theology tenüng asang aser "Pope Benedict XVI süogo. Pa ya Catholic Church indang takum meimer lenir ka lir, shibai tanur raksa indokba temenen mapa temai adoktsüba nungi atsüngzüka mao," ta shia liasü.

Conservative commentator aser kaket zülur Michael Knowles-ia "Kum aika ajembanga yur Traditional Latin Mass melaba ya Pope Benedict XVI mapa lir aser iba yongji Catholic lanur aika temolung meyip aser asendenshia liasü. Iba kisüng atema pa ya tamarener ka liasü," ta ashi.

Pa asüba sülen dangar temi Catholic arogo telungzük nung shi nung medemtsü asoshi tashiyim amshiba tsütsü Pope

Benedict XVI-i temolung magütsüba aija ola adoker.

Pei meteta shi nung medemba mapa tamajung inyakba anema pai kecha meinyak, ta German law firm kati bushitetba indang news channel NPR ajanga lepa bener arua sangdong aser yangji ashiba agi, 1945-2019 tsüngta archdiocese telungzük nung nisung 497 dak tashiyim yimya balala amshia liasü, item rongnung timtem ajurur shilem 60 shi arishi kum 8-14 tsüngta, tebur 247 aser tetsür 182 liasü, mapa tamajung inyakba 235 osang ketdangsur nem agütsü aser item rongnung 173 bo tang teinyakdak putirtem lir.

Item mangatetep liaka Vatican News ajanga Pope Benedict XVI ya "Tsüngremer tsükmenatsü lu nung inyaker ajemalur ka lir aser pa Tebu kidangi meyiba ogo" ta ashi.

Pope Benedict XVI asüba ya alima nung aliba Catholic arogo temi kanga junga meteter, kechiaser tamanger billion 1.3 mangyim tenzü.

St. Peter's Square nung asü pila sentong Pope Francis-i anir agitsü aser pa St. Peter's Basilica nung aremstsü.

## Uganda nung pastor ka dak acid inloktsü

**Nairobi, Aenjeti/January 03 (Agencies):** Uganda yimtiba nung Muslim yimsü akhanga amunger temi pastor ka mesüzüka anir oa acid inlokja liasü, ta osangtem ajanga ashir.

Kampala nung December 22 nü Mbarara nungi Pastor Frank Mutabaazi dak acid inloktsüba ajanga tenük külen agi dang sümia angur aser achi-ajemba nung timtemer aser o junga mejembiteter. Pa tapubang kanga sashia rongsa aser nguyangushi anentsü mozü magi memejangteter.

Kampala kübok Kasubi tesem nung aliba tekülem ki ka nung nikongdang sentong nung o jembiba sülen Muslim yimsü akhanga amanger ka arogo züngsem ama arua pa den salem asü, o kanga junga jembio go ta tenüngsang agütsü aser Kampala anüolen Busega tesem leni gari nung aotsü asüngdang, ta pai ashi.

Mbarara nung par kidangi meyiba aotsü anasa pai Muslim nungba aniok aser Kampala-Northern Bypass Highway leni ao.

"Ni main road leni aodang iba nisungbai phone nung nisung balala den jembitenzü," ta Pastor Mutabaazi-i Morning Star News dang kanga kangshia ashi, kechiaser acid agi pa tepang rongsar liasü.

Lenmang nung tena tatsüka jajar Muslim nungbai gari nungi aluner ta ashi. Iba mapang pastor-i pa dang ano talangka aotsü lir ta ashidang pai medemer ka semdangtsü lir, ta langzüa liasü.

"Pa gari nungi ayazükdang nisung asem Islamic nung aben-süoshi agir aru aser bottle ka agizüker window ajanga inloktsü aser ni parnok yimsü asoshi tsükchir aser ashiochtsür nisung ka aser takum alitsü metemtsü ta shia liasü," ta Pastor Mutabaazi-i ashi.

"Iba sülen ni kecha memeteti akum aser ghonda pungo lir ni Namunghona nung mozüki ka nung liasü."

Pa dang phone ajanga central Uganda nung Masaka aser Kambala, anüdoklen Mbale aser Pallisa aser

northwest tsütsü West Nile sub-region nung sayutsüngia jajaba anentsü takhangba agüja liasü, ta pai ashi.

Text message ka nung, "Nai ozü züngsem Khristan yimsü agizükdaktsüba temenen mapa onoki repranga arur. Nü takum lendong nung lir ta metetang," ta shia liasü.

Pa kanga kumdanga aru saka Muslim nung ka tekülem sentong nung arua adentsü imla meliasü, ta pai ashi.

Pastor Mutabaazi ya tang tashi temang nung timtem lir asünung police nem ken o magütsüteti lir.

Uganda nung Khristanpur reshikangshia aruba rongnung ibai tang tasenba alitsü.

Uganda nung tzüzüng-ozüng balala ajanga tamangba yimsü tsütsü temeden agüja lir aser item rongnung pei tamangba yimsü melentsü temeden aser tamangba yimsü ka nungi kati melentsü temeden densema lir. Uganda nütsüng yongsük shilem 12 dak tema Muslim nung lir aser parnok ya linük anüdoklen timba alir.

## ANO GO ABEN TSÜNGREM DEN

### Temeshi Rasaba

T.Ken 58:1-11

Tanü Tsüngremer nüburtemi temeshi rasaba sayutsü nungdaker. Sensakertem ajemrepba aser politician-temi ozüng raksaba asenoki kodanga pelaseta magizüker. Tsüngremi temaba menden nung amenertemi parnok asoshi dang tashi amshibaji maginer. Shidakba yimsüsürtemi parnok tashiji nübur aser par linük yanglutsü amshir. Dawidi iba ken pa temeshi tejashiba agi zülu. Pa jashia mali asü saka temulung ayanga iba ken zülu.

Dawidi yimsüsür temenen anema jembu (t. 1-5). Parnok o temeshi masü, aser parnoki ochi o bendang magütsü (Yob 31:6). Parnok tekai seret shidak mamshir, kechiaser parnok temulungjang tamajung liasü. Dawid parnok per ka den atishia jembu (t. 4). Dawidi tanishirtemi o bendang (t. 6-9). Tanishirtem asoshi obendangba arutsü noksa terok agütsü: 1) tebu maket molusongzü (t.6) Kenü Tsüngremeri tebu atsüdoktsütsü aser parnok Teküzmzüker malitsü; (2) ali nung tzü remadokba (t.7)-tsükla sülen, tsünglu malur aser ali telungi luadoker; (3) teraksa lijakjang (t.7)Tsüngremeri parnok akhümdong ajak agientsü; (4) yimsaa aoba küpra (t.8) tamajunger parnok sasa tali aodang yimsaadoktsü; (5) tasü asoba nu (t.8) parnoki timtem aika ajurutsü aser asütsü; aser (6) chipo mopungi oner aoba (t.9) parnok sentong tatem matemtsü, aser parnoki Tsüngrem terasabai raksatsütsü.

Dawidi pai Tsüngrem tushiba metetdaksü (t. 10,11). Asenoki asen sasa mang mayanger, saka tamajunger Tsüngremeri ochi o bendang nung pelar (J.Adok 18,19). Pai pa tsükchirtem madak noktaksü. Kenü temeshipuri Tsüngremeri takok anguba nung pelateptsü. Alima o bendangtsü pai aremzüka atar. Kodang ibaji atalokdir Tsüngremeri tim bendangtsü, aser Yisu sentsüwangshitsü.

Tashi mejungi amshibaji tejen tebilemstsü lir. Shirnoki pei tashi mejungi amshir parnok dangi kechi arutsü Laishibai ashir. Tsüngremer nüburtemi parnok temeshi terasaba sadoka ashitsü, kechiaser kenü tamajunger o bendangtsü ta asenoki metet. Pa takokba nung aser temeten nung aruba asoshi Pa tenüng tushiang.

## Lauren Daigle-i sen \$600,000 dak tema tenla agütsü

**Aenjeti/January 03, 2023 (Agencies):** Khristan ken atener Lauren Daigle-i lar The Price Fund ajanga charity tem asoshi sen \$600,000 dak tema tenla agütsü. The Price Fund ya tila-tanur, teintet rogo aser nungdabapur yaritsü tentetba mission ka lir.

Gospel Music Association ajanga ashiba agi, Daigle-i New Orleans nung la indang Christian show tem mapang New Orleans' Ellis Marsalis Center, Roots of Music, NOCCA, KidSmar, aser Young Audiences of Louisiana nem sen \$100,000 tenla agütsü.

The Price Fund nung shilem ka ama 2022 kum tatemlen lai charity balala nem sen agütsüba ya \$681,000 shi alitsü, ta The Christian Post ajanga ashir.

"Volunteers temi anibelem mesasai tanen makai mapa inyakba den item lokti tentet ajunga nungi shilem alir temeim aser temolungtetba ajanga kü molung nung kongshi aser ajungmeso," ta Daigle-i ashi.

"Parnoki anogoshi nisung meyrirjang aika takum nung

kongshia nungdabapur nem tesangwa aser teimla jenti agütsüba kisüng masü saka parnoki tatishtsü tajung sayur."

The Price Fund ya Daigle-i 2019 kum tenzü. Concert-i aortemi ticket ayokba, merchandise ayokba aser streaming asüba nungi tenla bendener. Iba The Price Fund ya tenzüker alima nung tajangzük mebushiba lokti tentet 37 shi nem sen million \$2.2 dak tema agütsüogo.

"Nisung ajakibo Tsüngrem indang manganer ta ni meteta lir. Saka Tsüngrem ya temeim, Pai aria bilemer, aochir ta nüburtemi metetnüba ni nguteta lir. Iba yimya nung Khrista indang ashir," ta Daigle-i The Christian Post dang ashi.

2021 kum sensaksem ka nung Daigle-i high school nung azüngdang Tsüngrem dang nungdabapur yaritsü asoshi la nem 'tongtoret' agüjang ta sarasademba indang shia liasü.

"Tsüngrem dang nai tasü-tait molungsenttsü asüngdangra Pai agütsütsü," ta lai ashi.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Onet**

(n) ozü tapu ka, arasentsür ozü (bulbul)

\* **Onet** ozüi meimchir nem osang agütsür.

**Ong**

(n) nisung meimchir (human being)

\* Longtrok nung **ong** trok apok ta tsüraburi jembir.

**OLONG PAITEP # 6389**

1		2		3		4	5			
				6						7
		8								
9				10		11				
			12						13	
						14				
16										17

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S \_ \_ \_ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatemangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

**OLONG PAITEP # 6388 TELANGZÜBA**


**TIPIEN :**

- 2. Kangki, 6. Yiru, 7. Chitem, 9. Küm,
- 11. Oba, 13. Tatong, 15. Sang,
- 16. Angati.

**LANGTSÜNGLEN :**

- 1. Taochi, 2. Keyi, 3. Inyaktet,
- 4. Marem, 5. Ama, 8. Tejangja,
- 10. Angsem, 11. Ojang, 12. Ata,
- 14. Oagi.

**Agüja aliba noksa nung meputepi**  
**aliba 10 bushiang**



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Defence Minister Rajnath-i BRO indang mapatong 28 sayatsüogo**

**Itanagar, January 3, 2023**

(Agencies): Union Defence Minister Rajnath Singh-i January 3 nü Border Roads Organisation (BRO) indang mapatong 28 tashi sayatsüogo.

Arunachal Pradesh nung Along-Yinkiong Road nung Siyom Bridge lapoktsüba sentong nung pai tanga mapatongtem sayatsü.

Mapatongtemji Siyom bridge dena apu 22, lenmang 3 aser tanga mapatong 3 dena lir.

Item mapatong ya Ladakh nung 8; Arunachal Pradesh nung 4; Jammu & Kashmir nung 4; Sikkim, Punjab o Uttarakhand nung asemsem aser Rajasthan nung 2 lir. Iba

dak alia telemedicine nodes 3-Ladakh nung 2 aser Mizoram nung 1 lapoktsü.

Sorkar aser BRO külemi arrtsülen renloktsü atema yaritepba ajanga item mapatong inyaktetogo. Iba ajanga Armed Forces ajanzüker aser meta talang pilar alidak lokti aser rongsenketzüng renloker, ta Rajnath-i ashi.

Prime Minister Narendra Modi-i aniba sorkar indang tongtipangtiba mapaji arrtsülen sendakteptsü aser renlokdkatsütsü atema lir, ta paisa ashi.

"Alima nung tanü mepetmesü aika adoka lir. India-i teti rara anema noktaker. Tawa Prime

Minister Narendra Modi-i tang ya raraba putu masü ta ashiba alimai angashiogo. Asenoki rara dak mamanger saka raratsüsa kümra asenoki raratsü" ta Defence Minister-isa metetdaksü.

"Asen linük lendong ajak nungi kümzüka ayutsü. Asen Armed Forces renema dang lir aser BRO-i parnok den külemi yaritepa jajaba angudang kanga pelar" ta paisa ashi.

Mongulbarnü Along-Yinkiong Road nung Rajnath Singh-i Siyom Bridge lapoktsü.

Siyom Bridge ya Siyom ayong temdangba metre 100 talang apu lir aser iba ya Class 70 Steel Arch Superstructure lir.

**Amit Shah-i Manipur semdangtsü aliba atema state sorkar renemshir**

**Imphal, January 3, 2023**

(Agencies): Union Home Minister Amit Shah-i January 6 nü Manipur semdangdang lapoktsütsü aliba tesem Chief Minister N Biren Singh-i anir cabinet züngsemtemi semdangogo.

N Biren Singh-i anir par teloki yashi Heingang Imphal East nung Marjing Polo Complex semdangba sülen tanü Churachandpur Medical College semdangogo.

Iba mapang Biren Singh-i Peace Ground, Tuibong, Churachandpur District nung open gym lapoktsü. Iba gym ya Chief Minister's Indigenous

Martial Arts Akademi kübok yangluba lir.

Union Home Minister Shri Amit Shah-i January 6, 2023 nü Churachandpur Medical College lapoktsütsü.

Mongulbarnü Health & IPR Minister Dr Sapam Ranjan; RD & PR Minister, Y Khemchand; MLA Vungzagin Valte, MLA LM Khaute, MLA Paoliental Haokip, MLA Ngursanglur, MLA Chinlunthang, MLA Letzamang Haokip, chief secretary (CS) Dr Rajesh Kumar; DGP P Doungel; DG (Prison) C Doungel, Addl CS Vumlunmang, DC Churachandpur Sharath

Chandra Arroju aser ketdangsurtemi CM Biren meina liasü.

Külen, Mongulbarnü Manipur police-ia Union Home Minister Amit Shah arutsü aliba dak sendakba nung tesem balala mita ao.

Manipur police indang commandos-i Changangei Awang Leikai, Changangei Ucheckon areas, Dharmasala, Bora Gali aser Alu Gali, Khwairamband Bazar mita senzü.

Iba mapang parnoki ki 100 tashi mita ao aser temlung meleme bilemer nisung 200 tashi jangjaogo.

**Arunachal APPSC paper leak ken o dak sendakba nung nisung 2 apu**

**Itanagar, January 3, 2023**

(Agencies): Arunachal Pradesh police indang special investigation cell (SIC)-i APPSC paper leak ken o dak sendakba nung nisung ana pusemogo.

January 2 aser 3 anogotem Arunachal Pradesh police indang SIC-i tena apu. Tenaprong ya Arunachal Pradesh sorkar ketdangsurtem lir.

Iba ken o dak sendakba nung police-i tang tesüsabuba apuba nisung ana ya Loter Gadi (31) aser Lotu Gadi (38) na ta jangjaogo.

Tena apuba züngsema Arunachal Pradesh nung APPSC paper leak ken o dak sendakba nung police-i nisung 39 puogo.

Arunachal Pradesh nung assistant engineers (civil) indang

tatidang nung paper leak asüba ken o tulu ka adoka liasü. Iba tatidang ya Arunachal Pradesh Public Service Commission (APPSC) ajanga agi.

Civil servants, engineers aser tanga sorkar ketdangsurtemi tatidang nung takok angutsü atema taoba APPSC deputy secretary Taket Jerang dang nungi question papers alizükba atema tai tongloka pua lir.

**GOVERNMENT OF NAGALAND**  
**DIRECTORATE OF HEALTH & FAMILY WELFARE**  
**NAGALAND: KOHIMA.**

**NO. DHFW-3/VACANCIES/DRV/DTE/19-20/**

**Dated, Kohima the thDec'22**

**ADVERTISEMENT**

In pursuance of the Government of Nagaland, Department of Health & Family Welfare letter No. HFW(A) -8/73/2019/637/ Dated Kohima, the 22nd December 2022, Applications are hereby invited amongst the eligible candidates for filling up the under mentioned Driver posts as shown below under the Department of Health & Family Welfare Nagaland:Kohima. This is in compliance of the P&AR UO No.1058 dated 15th December 2022 and concurrence of the Finance Department Vide RFC/ESTT. No. 35/40 dated 16th December 2022.

Sl. No	Designation	Pay Matrix/ Level	No. of Posts	Place of Posting	Eligibility criteria
1.	Driver	Level-3	27	DHFW-7 CMO Kohima-3 NHAK-3 WOKHA-3 ZBTO-1 MON-2 TUENSANG-2 SPHL-1 DIMAPUR-2 PEREN-1 KIPHIRE-2	1. Driving license 2. Open for all indigenous inhabitants of Nagaland (Certificate to be enclosed) 3. ST/BT Certificate 4. 2 Passport size photos

- (1) The minimum age of candidate shall not be less than 21 years and not more than 37 years of age as on or before 22nd April 2023. The relaxation of upper age limit will be governed by the existing policy of the State Government, including those relating to serving State Government employees.
- (2) The reservation of seats shall be as per the existing policy of the State Government as notified by the P&AR Department Nagaland.
- (3) Application should reach the Principal Director Health & Family Welfare Nagaland Kohima (Room No301) on or before 04.01. 2023.
- (4) Candidates are required to submit Rs. 200/- as fee at the time of form submission. Those who have already submitted their applications may also submit the same amount at the time of issuing of admit cards.
- (5) Interview will be held on 07.01.2023 from 11am onwards at the Directorate of H&FW.
- (6) Mode of selection:-  
(a) Driver:-Test driving will be conducted.

**(DR. K. VIKATO KINIMI)**  
Principal Director  
Directorate of Health & Family Welfare  
Nagaland: Kohima.

### Tokyo yutsür aor nem Japan sorkari sen agütsütsü

**Tokyo, Aenjeti/January 03 (Agencies):** Tokyo metropolitan area yutsür aotsü telemteba agir tanur aliba kibongtem nem Japan sorkari taruba fical year nungi senotsü teyari agütsüba timba kumtsütsü.

Sorkari tanur shia nem par sen yen 1 million (\$7,500) agütsütsü, koba yen 700,000 agi timba kumtsür alitsü.

Iba teyari ya 2019 küm tenzük aser tanur asoba rate ajema akumba aser teintet rogo timba aliba tesemtem nung tanur timba kumdaktsütsü nükjidong nung iba sentong ya tenzük.

Tokyo indang ward 23 nung 2022 küm densema tesüiba küm ter tsüngta küm pungo tashi lia arurtem iba sentong nung temsüa lir. Mapa inyaker tsürabur aliba kibongtem Tokyo lenir arur aser ano Saitama, Chiba aser Kanagawa prefectures nung alirtema temsüa lir.

Parnok tesem melenshia aodak company tila nung inyakba tsürabur asütsüla, internet amshia parnok tesem memelenshidang ama mapa inyaksü aser parnok alidak business ka tenzüktsüla.

Tanur ka dak tema aliba kibongtem nung senotsü teyari tali agütsütsü iba sentong yagi melar. Tang aliba subsidy ta tanur ka nung sen yen 300,000 lir.

Iba ozüing ya April tenzükba mapang nungi amshia aotsü aser tanur ana aliba abuani nem sen yen million asem tashi agütsütsü. Tsüraburtem ya income test agütsü menüingdaker.

Japan nunger tsüraburtem dang tesem taseni orr ita asem nungi küm ka tsüngta parnok alidak sorkar dangi oa parnok yangji tajemba agi küm pungo bo alitsü tebilemba sangdongtsü ashi. Parnok yangji küm pungo ji junga melira sen meyipa meshitsü.

Iba sentong kübok municipalities 1,300 shi dena lir.

2021 küm kibong 1,184 nem relocation assistance agüja liasü. 2019 küm iba incentive program agir kibong 71 liasü aser 2020 küm kibong 290 liasü. 2020 küm timba akum, kechiaser eligibility criteria nung remote work bendenlok.

Digital Garden City Nation ka atema Infrastructure Development Plan nung shilem ka ama iba sentong ya lir, ta Japan sorkari ashir. Iba yagi capital region kisüing masü saka danga region tem nunga terenlok lidaktsütsü nükjidong nung inyaker, ta Nikkei Asia ajanga report ka nung ashi.

2027 küm tashinung yimtsüing temi yokba kibong 10,000 jungdaktsür alitsü sorkar nükjidong lir. Nüburtem yimtsüing nung alitsü yimya sübadaktsütsü asoshi temeket terenlok aser relocation plan kasa aotsü, ta sorkari ashi.

Iba sentong nung self-driving bus, remote medical care aser official satellite offices tem amenokba densema lir. 2022 küm August ita tashinung satellite office 654 amenoker liasü.

### OFFICE OF THE UNGER IMSONGUNGER KIDONG TELONGJEM DIMAPUR : NAGALAND KONANG TETUSHI AGÜTSÜR

Dimapur Unger Imsongunger Kidongi **Wb. C. Lima Imsong** Sorkar mapa nung Additional Commissioner of State Taxes jenjang tuluba ngua kidong aser Sensosanger nem konang nungsang tulu bener arutsüba asoshi pelar aser konang tetushi agütsür.



Tarutsü nung Tsüngremi nü wadang aser nür kibong ano maneni moajangma ta asen Imsongunger kidong züngsem ajaki sarasademtsür,

Sd/-  
**SHILUMEREM IMSONG, (Secretary)**

### TEPELA LEMSATEPER



10.03.70 - 15.12.2022

Teti meima alila kinungtsü **LULENYANGLA LKR (UNGMA)**, shiranga alidang nungi akümüli tembangba tashi nung, kija, kibong aser telok balala shirnokisa ozü kibong den mangyim jashi lemsatepba den rongsen, nübu, sarasadem aser temeim mapa balala ajanga yaritepogo, nenok ajak dang kangasa pelaba metetdaktsür. Tsüngremi nenok mapa tajung asoshi talubosa moajangma.

~ Temeim kinungbu, jabaso & kinungertem

### Ukraine tashi temdaktsütsü atema Russia-i tasa asadar: Zelensky

**Kyiv, Aenjeti/January 3**

**(Agencies):** Ukraine tashi temdakja bendanga agütsüdadaktsütsü atema Russia-i anüing ajanga tesem balala poktsatsütsü aser Iran nung yangluba drone amshia amaktsü tasa asadar, ta Ukraine tir Volodymyr Zelensky-i ashi.

Hombor aonung linük den sensaksemba mapang Zelensky-i, itangitertem osang ajanga Russia-i drone tem amshia linük tali amaktsü sentong aliba angazükogo, ta ashi.

"Russia-i Shahed drone tem amshia linük mapang talangka amaktsü tasa asadar, ta osang angzükogo," ta Zelensky-i ashi.

"Ukraine nungertem, anti-aircraft defences aser energy temdaktsütsü atema parnok sentong lir," ta pai ashi.

Paisa, tangartem ama Ukraine-i kiralongrartem nükjidong matalokdaktsütsü atema inyaksangshir, ta ashi.

New Year atongtsü anogo ka lia aser New Year nü missile aser drone tem amshia Kyiv densema yimti balala maka nisung pongu tashi tepset aser aika yiruja liasü aser iba sülen Hombarnü anepdang züngia lia drone amshia Kyiv aser temeket nung aliba tesemtem makogo.

Zelensky-i ashiba agi, Ukraine nunger sepaitemi 2023 küm mezüngbuba anogo ana nung drone aika khazüka yokogo aser ano timba akümütsü

imlar.

"Küm tenzük anogo ana dang süiogo aser Ukraine nung drone 80 dak tema khazüka yokogo," ta pai ashi.

"Tarutsü nung timba akümütsü imlar," ta paisa ashi.

Russia nunger sepaitemi kamikaze drone tem tali amshi tenzükogo. Iba drone nung bomb aika keta lir aser drone ya yimtemba sülen alileni kanga kar indang indanga alur aser iba ajanga teraktsatsüba tulu adokdaktsür.

Iran nung yangluba Shahed drone tem ya kanga takarabo masü aser Ukraine air defence atema khazüka yoktsü temela, ajisiüaka Russia-i tesem ka amaktsü atema drone tem aika yoker aser iba ajanga Ukraine indang air surveillance aser defence system tashi temdaktsür.

Iran-i Russia nem drone tem magütsür ta shia aruogo, ajisiüaka November ita parnoki Russia nem drone kar agütsüba nangzükogo, saka Ukraine nung rara metenzük tsüngda agütsü ta ashi.

Tehran-i iba osang sangdongba dak Zelensky-i tamang maker aser ashiba agi, tang tashi nung parnok khazüka yokba Shahed drone tem ya parnoki Russia nem agütsü ta ashiba dang nungi timba lir.

Ukraine nunger military ketdangsurtemi Hombarnü ashiba agi, parnoki anogo asem tsüngda drone 39 khazüka yokogo.

### PELABA SANGDONGER

ALIYANGBA IMCHEN (LIRMEN)

ASO - 02.01.1932 ASÜ- 24.12.2022

Onoki teti meima aliba tsürabur Asür Aliyangba (Lirmen) mapang tatsüka shiranga alidang aser akümüli wadang tembanger onok mangyim jashi nung alidang Arogo, kija aser lokti balala shirnokisa rongsen, nepu aser sarasadem nung yariogo, nenok ajak dang kangasa pelaba lemsateper.



Asen teyanglur Tsüngremi nenok kija kibongtem tali moajang ta ozü tamang sarasadem.

Temeim Kinungertem

### MENUNGRA BILEMTETER



Asür Achusangba Longchar (Mangmetong)

Asoba: 1931 - Asüba: 4.1.2022

Ajaki temeimba Obala, onok toktsür iba lima nungi pilar tanü küm ka (1) ajunger saka onok mulungjang dang tashi rongjenseta na bilemer. Nü temeim mapatem, tamang sarasadem, Tsüngrem dak ochi tamang agi azüita amangba aser shisa taka sayuba tem taruba chirnurtem tashi rizünga ayutsü aser kodanga mamadoktsü.

Na kodak nung tepela nung lir ta amanga onok mulung süngzükur.

Teti tatem makaba tepela kodak nung tanaben ajuruteptsü amanga atar.

~ Temeim chirmur, semchirtem aser kinungertem.

### MULUNGNEN O

"Ni rara tajungji raraogo, ni alizüing tonga asemogo, ni tamangji yuogo" (2 Timoti 4: 7)



ASO  
23-11-1939

ASÜ  
26-12-2022


Onoki meima aliba tsürabur asür **Wb. I. Sowa Aier** (Longjang) shiranga aliba mapang nungi asükhü mangyim tashi nung kija, kibong aser telok balalai temeim mapa sayua nübu, rongsen aser tamang sarasadem agi onok nungita yariba atema nenok ajak dang kanga pelar. Maneni item loktitem metetshiang melitet nung nenshia pelaba lemsateper:

1. Longjang Baptist Arogo
2. Longjang Pensioner Association
3. Longjang Senso Mungdang
4. Longjang Kaketshir Telongjem
5. Lametong Mepu (Ward)
6. Longjang Aier kidong
7. Marepkong Baptist Arogo
8. Marepkong Ward Yimden
9. Marepkong Ward-sangertem
10. Mokochung Town Ao Baptist Churches Mission

Tematiba Takoksang Temoatsür Tsüngremi teyariteper ajak moajangma.

~ Temeim Kinungtsü, Chirmur, Semchirsemmur, Anükapang & Kinungertem

## Amir-i Pak team nungi asayanera menokdangtsü: Najam Sethi



**Aenjeti/January 3, 2023 (Agencies):** Pakistan Cricket Board tekolakba Najam Sethi-i ashiba agi, Mohammad Amir-i international cricket nung tanaben asayanera pai menokdangtsü.

Amir-i 2019 küm pa Test asaya nungi anenba sangdong aser iba sülen küm ka lir cricket asaya ajak nungi anena liasü. Management-i pa dak mejungi benshir ta shia pa asaya nungi anena liasü. Amir ya spot-fixing nung shilem agiba atema asaya nungi tenokdangba dena agüja liasü.

PCB nung lenirtem melenshiba sülen National High

Performance Centre nung traning agitsü atema Amir nem temelaba agütsüogo aser iba ajanga pa meyipa arur asayatsü akok ta bilemer. "Pakistan nungi tanaben asayatsü atema tejangraba sayura ni Mohammad Amir nem tenokdangba magütsütsü," ta Sethi-i ashi.

"Asayar ka shibai aibelenba nangzükogo aser match-fixing aser ochimashi inyakyim nokdangba nung ICC nem teyari agütsü aser küm pongu temerenshi agütsüba sülen meyipa aruru asayaogo pa tanaben meyipa arua asayatsü langa lir," ta pai ashi.

Sethi-isa, taoba PCB mendenbuba Ramiz Raja aija ashiba agi, "selection committee aser chairman Ramiz Raja densema taoba PCB lenirtemi pa tangar ama mamshi ta Mohammad Amir-i bilemer. Ramiz Raja-i, cricket asaya nung aibelenertem Pakistan tenung nungi tanaben asayatsü memelatsüla ta bilemer. Ajsüiaka kü tebilembabo yamaji masü. Shirnoki temerenshi agizükogo parnok tanaben asayatsü atema melatsüla ta nibo bilemer."

Taoba ita züngsem 14 agi kümtebta management committee ka Pakistan Ato Kilonser Shahbaz Sharif-i nominate asü aser board ya Sethi lenisüba nung inyaksangshidar. Cricket board election ya taruba ita asem tsüngda agitsü.

Pakistan sorkar-i taoba ita sangdong ka ajanga Raja mendenbuba mapa nungi aginba metetdakja liasü. England den Test asaya 3-0 agi makokba sülen iba osang sangdonga liasü.



Indian Women team nungi Dhaka, Bangladesh nung December 26 nungi 31 tashi asayaba 4buba South Asian Sepaktakraw Championship nung gold medal ana tashi ngua asayaba asayar Sezovelu Dozo aser Seyiekhrieno Tapa na nem tenüngsang agütsüba sentong ka Nagaland Sepaktakraw Association-i ayongzuka katsüogo. Iba sentong nung Director of Youth Resources & Sports, Govt. of Nagaland alakteta jaoker liasü.

## Cameroon nung U-17 football asaya 21-i küm meimshiba potet

**Aenjeti/January 3, 2023 (Agencies):** Cameroon nung Under-17 asayar 21 küm tai amshiba potetba sülen disqualify sütsüogo, ta Daily Mail sangdong ka ajanga metetdaksü.

MRI tests agiba sülen taküm UNIFACC asayamung atema shimmer aliba asayartem timba disqualify sütsüogo kechiyong parnoki iba tetendangba majangtet.

MRI tetendangba ya asayartem arishi küm jangjatsü atema parnok tekanü scane asür aser parnok teret ainba tendanger, ta Daily Mail sangdong ajangsa metetdaksü.

Cameroon sangdong ka ajanga ashiba agi, "Cameroonian Football Federation-i, African U17 Nations Championship atema qualification asaya; UNIFFAC Limbe 2023

tournament atema renemshiba nung shilem ka ama MRI tetendangba agiba mapang asayamung nung shilem agitsü atema shimba asayar 30 nungi 21 tetendangba majangtetba nüburtem nem metetdaksür. Parnok ajak iba telok nungi aginogo. Parnok melentsü atema jenjangtem agiogo."

"COMEX tawabangba kübok FECAFOOT tiri tetuyuba tesashi agütsüba sülen iba jenjang agia liasü. Taoba mapang arishi küm meimshiba ajanga Cameroon football achaayangba lokti tentet tongtiba tenung menüktsüba tembangdaksütsü atema iba jenjang agia liasü. FECAFOOT-i actor aser talisa educator tem dang category balala nung arishi küm tatakzük akümstübuttsü mepeshir," ta

kasa sangdong ajanga metetdaksü.

Asayartem arishi küm dak sendakba nung Africa linüktem aiben mepetmesüi aier, aser aikati international asayamungtem nung junior jenjang nung parnoki takok anguba ya over-age asayartem anioka asayadaksüba ajanga lir ta ashir.

1989 küm FIFA-i Nigeria nem tenokdangba agütsü. 1988 Olympics nung asayaba asayar aseme taoba asayamung nung amshiba arishi küm balala asüba ngutetba sülen tenokdangba agütsü.

2019 küma Equatorial Guinea pur Under-17 World Cup nung shilem magidaksü, kechiyong parnok asayar ana arishi küm meshidakba poteta liasü.

## Sri Lanka den ODI asaya atema Jasprit Bumrah shimogo



**Aenjeti/January 3, 2023 (Agencies):** Sri Lanka den India team ODI asem asayatsü aliba atema pacer Jasprit Bumrah-a shimokba Board of Control for Cricket in India (BCCI)-i metetdaksüogo.

Taoba küm September ita Australia den T20I asem asayaba sülen Bumrah yiruba ajanga Australia nung T20

World Cup nunga shilem magitetsüsa aküm.

Pa rehabilitation sentong ka nung shilem agiogo aser National Cricket Academy (NCA)-i pa asayatetsüsa tema tajungba akümba kuli agütsüogo aser Indian ODI squad nung yakta adentsü, ta BCCI sangdong ka ajanga metetdaksü.

Taoba küm July ita India team England nung oa asayaba mapang pa teberem yiru aser ita ana dak tema asaya ka nung danga shilem magi-i liasü.

India tebur team Sri Lanka den Mongolbarnü nungi tenzuka bilateral series ka asayatsü. Iba asayamung nung T20I asem aser ODI asem asayatsü.

Asayar 17 agi kümtebta ODI team ya Rohit Sharma lenisüba nung asayatsü aser Hardik Pandya-i anir T20I tem asayatsü. Hardik ya ODI nung vice captain asütsü asoshi shimogo.

Sri Lanka den ODI asaya atema India team nungi asayartem:

Rohit Sharma (Captain), Shubman Gill, Virat Kohli, Suryakumar Yadav, Shreyas Iyer, KL Rahul (wk), Ishan Kishan (wk), Hardik Pandya (VC), Washington Sundar, Yuzvendra Chahal, Kuldeep Yadav, Axar Patel, Jasprit Bumrah, Mohd. Shami, Mohd. Siraj, Umran Malik, Arshdeep Singh.

## World rankings: Manika Batra 35buba tongogo



**Aenjeti/January 3, 2023 (Agencies):** India tsürtem rongnungi nungtugu table tennis asayar Manika Batra Mongolbarnü sayaba ITTF world rankings nung jenjang 35buba nung lir.

La jenjang asem tejkadangi tua 35buba tongtetogo, koba la indang career nung tang tashi nung jenjang tajungtiba asütsü.

Arishi küm 27 tain asayar yagi November ita Asian Cup nung India atema mezüngbuba medal koka liasü. Bangkok nung iba asayamung nung lai Japan tsür world number five Hina Hayata aser China tsür world number seven Chen Xingtong na tsükdaksüba sülen otsüsütsüsa mezüngbuba bronze medal ngua liasü.

Iba takok anguba sülen lai ranking nung points 175 angu aser iba ajanga la temaba jenjangi atuba nung teyari agütsü. Kasa mapang nung lai Hungary aser Slovenia nung WTT Contender events ana nung semifinal tonga asayaogo. "2018 küm Commonwealth

Games den külemi Asian Cup nung takok anguba ya kü indang career nung asayamung tajungtiba ka liasü. Ni jangradema asaya aser kūsasa dak kanga temulung lemteta asaya liasü," ta Manika-i PTI dang ashi.

Birmingham nung 2022 Commonwealth Games nung medal ka danga mekoktetba sülen lai Asia Cup nung iba takok ngua liasü. Küm pezü tejkadangi Gold Coast nung Commonwealth Games asayaba mapang lai gold medal ana densema medal pezü ngua liasü.

La iba hopta Doha nung World Championships atema Asian qualification asayamung nung shilem agitsü. Iba sülen la ita tatemi Doha nungsa WTT Contender nung shilem agitsü aser taruba ita Goa nung WTT Star Contender nung asayatsü atema renema lir.

Teburtem ranking nung G Sathiyam jenjang 39buba aser asayar tejen Sharath Kamal jenjang asem asepzükalua tang 47buba nung lir.

## BILEMDANGANG

"Mera tasen kanga junga bilemdanger agiang."